

Inatsisissatut siunnersuummut nassuiaatit

### **Nalinginnaasumik oqaaseqaatit**

#### **1. Aallaqqaasiut**

Siunnersuutip siunertarivaa aalisarnermi angallatinik isaterinermi tapiissutinik tuniussinermi tapiissutit annerpaaffissaasa nikisinneqarnerat.

Allannguutissatut siunnersuut saqqummiunneqarpoq isaterinissamut tapiiffigitinnissamut qinnuteqaatinik aalajangiisussap ataatsimiititaliap suliaqarneranik tunngaveqartumik. Ataatsimiititaliap maluginiarsimavaa sammisami malittarisassat atuuttut sakkortuallaartut, taamaalilluni isaterineq ilimagisatut annertutigisimanani.

#### **2. Siunnersuummi pingaarnertut tunngavigineqartut**

Malittarisassani atuuttuni, Aalisarnermut aningaasaliissutinut immikkoortitat pillugit Inatsisartut inatsisaat nr. 15, 20. november 2006-imeersumi, kingusinnerusukkullu Aalisarnermut aningaasaliissutit immikkoortitat pillugit Inatsisartut inatsisaata allanngortinneqarnera pillugu Inatsisartut inatsisaat nr. 13, 2. december 2009-imeersumi isaterinermi tapiissummik naatsorsuinermi tapiissutit annerpaamik sillimmasiinerup nalingata 75 % - erivaa. Taamaalilluni isaterinermi tapiissutit tunniunneqarsinnaasut annerpaaffiat angallammik sillimmasiinerup nalingata 75 % - erivaa.

Aalisartut isaterinissamut ataatsimiititaliap ilaasortaanut nassuiaasarsarsimapput, qinnuteqartarsimanatik, tapiissutit naatsorsorneqarnerani inernerana annikigalugu. Tamanna pissuteqarpoq sillimmasiisarnerup amerlasuutigut annikippallaartarneranik, imaluunniit angallat sillimmaserneqarsimanngimmat. Tamatuma kinguneraa tapiisutaasinnaasut killeqarnerannik, tapiisutaasinnaasullu amerlasuutigut ima annikitsiginerannik qinnuteqartup isaterisitsinissani naammassitikkusuttarnagu. Tamanna tunngavigalugu Aalisarnermut, Piniarnermut Nunalerinermullu Naalakkersuisoqarfik isumaqarpoq malittarisassat atuuttut kingunerigaat inatsisip aallaqqaammut atorneqarnissaatut ilimagineqaraluartut atorneqannginnera.

Siunnersuutigineqarpoq tapiissummumut qummut killiffissaq angallammik sillimmasiinerup nalingata 75%-ianiit 100 %-imut allanngortinneqassasoq, aammalu angallatinut sillimmaserneqarsimanngitsunut naliliinermi missingersuusiortoqartalernissaata ammaaffineqarnissaa.

Isaterinissamut tapiiffigitinnissamut qinnuteqaatinik aalajangiisussami ataatsimiititaliami akerliusoqarani siunnersuut tapersorneqarpoq.

### **3. Pisortanut tunngatillugu aningaasaqarnikkut aqutsinikkullu kingunissai**

Isaterinissamut aningaasaliissutit akuersissutigineqareerput. Siunnersuutip kingunerisussaangilaa aningaasaliissutit ilassutissaanik akuersissutiginnittoqassasoq.

2009-imi malittarisassami tunngavigineqarlutik assersuusiarineqarsimasunut sanilliullugu, tapiissutit akuersissutigineqartut naatsorsuutigisamik annikinnerupput. Naatsorsuutini tunngavigineqartuni naatsorsuutigineqarsimavoq sillimmasiinerup nalinga angallatip nalinginnaasumik niuerutigineqarnerata nalingata missaaniissasoq. Angallatit annikippallaamik sillimmasernejartarsimanerisa kingunerissavaa tapiissutaasinnaasut ikinnerunissaat. Allanguutissat siunnersuutip qulakkiissavaa aningaasaliissutaasut pilersaarutigineqartut atornejarnerulernissaat.

Taamaammat naatsorsuutigineqanngilaq siunnersuut pisortanut tunngatillugu aningaasaqarnikkut kinguneqassasoq.

### **4. Inuussutissarsiuteqartunut tunngatillugu aningaasaqarnikkut aqutsinikkullu kingunissai**

Siunnersuut inuussutissarsiuteqartunut aqutsinikkut piumasaqaatinik oqilisitsissaaq, siunnersuutip imarimmagu angallatinut sillimmasernejarsimannngitsunut sillimmasiinerup nalingata missingersuutaanik siunnersuut imaqalermat. Malittarisassani atuuttuni taamaaliortoqarsinnaangilaq.

Tamatununga naapertuuttumik siunnersuutip kingunerissavaa inuussutissarsiuteqartunut aningaasaqarnikkut oqilisitsinissaaq, allanguutissap kingunerissammagu qummut killissarititaasup 75%-imiit 100%-imut qaffanneqarnissaa, taamaalilluni tapiissutaasussat massakkut malittarisassanik atuuttuninngaanniit annerulissammata.

Siunnersuut paasissutissanik, akiliutissanik allanilluunniit piumasaqaatinik nutaanik kinguneqanngilaq.

### **5. Avatangiisinut pinngortitamullu kingunissai**

Siunnersuut avatangiisinut pinngortitamullu toqqaannartumik kinguneqassanngilaq. Taamaattoq maluginiarneqassaaq toqqaannangitsumik avatangiisinut kinguneqarnissaa naatsorsuutigineqarmat, naatsorsuutigineqarmammi siunnersuutip kingunerissagaa angallatit pisoqalisut amerlanerusunik ikilisinneqarnissaat. Tamatuma ikummatissanik atuneq aniatitsinerlu annikinnerulersissavaa.

### **6. Innuttaasunut tunngatillugu aningaasaqarnikkut aqutsinikkullu kingunissai**

Naatsorsuutigineqarpoq siunnersuut taamaallaat innuttaasunut angallatinik isatigassanik pigisalinnut imaluunniit angallatinik isatigassanik piginneqataasunut kinguneqassasoq. Taakkununga kingunissaa immikkoortup 4-p ataani ”Inuussutissarsiuteqartunut tunngatillugu aningaasaqarnikkut aqutsinikkullu kingunissai” allattorneqarput.

## **7. Naalagaaffeqatigiinnermut Namminersorlutillu Oqartussanut attuumassuteqarnera**

Inatsissatut siunnersuutip naalagaaffeqatigiinnermut attuumassuteqarneq sunnervianngilaa.

## **8. Pisortatigut oqartussat kattuffiillu tusarniaavigineqarnerat**

Piffissaq tusarniaaffiuvoq 17. maj 2011-minngaanniit 27. juni 2011-mut, ullut taakku ilanngullugit.

Siunnersuut KANUKOKA-mut, Sulinermik Inuussutissarsiuqartut Kattuffiannut (SIK), Sulisitsisut peqatigiiffiannut, NUSUKA-mut, KNAPK-mut, Inuussutissarsiornermut Suliffeqarnermullu Naalackersuisoqarfimmut, Ilaqutariinnermut Naalackersuisoqarfimmut, Peqqissutsimut Naalackersuisoqarfimmut, Nunamut Namminermut, Pinngortitamut Avatangiisinullu Naalackersuisoqarfimmut aammalu Aatsitassanut ikummatissanullu Pisortaqaarfimmut tusarniutigineqarpoq.

Naalackersuisoqarfiup makkuninnga tusarniaanermut akissutinik tigusaqarsimavoq: SIK, Inuussutissarsiornermut Suliffeqarnermullu Naalackersuisoqarfik aamma Nunamut Namminermut, Pinngortitamut Avatangiisinullu Naalackersuisoqarfik.

Inuussutissarsiornermut Suliffeqarnermullu Naalackersuisoqarfik nassiunneqartunut oqaaseqaateqanngilaq.

Nunamut Namminermut, Pinngortitamut Avatangiisinullu Naalackersuisoqarfiup taamaallaat siunnersuutip oqaaseqaatitaanut oqaaseqaateqarput. Oqaaseqaatigineqartut siunnersuummut ilanngunneqarput. Oqaaseqaatigineqartut ”Pisortanut tunngatillugu aningaasaqarnikkut aqutsinikkullu kingunissai” aamma ”Avatangiisinut pinngortitamullu kingunissai” tunngassuteqarput.

SIK oqaaseqaateqanngilaq, siunnersuummik tapersersuinerat eqqaassanngikkaanni.

### **Siunnersuummi aalajangersakkanut ataasiakkaanut oqaaseqaatit**

#### *§ 1-imut*

Nr. 1-imut

Siunnersuutigineqarpoq sillimmasiinerup nalinganut qummut killerititaasup 75 %-imiit 100 %-imut qaffanneqarnissaa.

Tamatuma saniatigut Aalisarnermut aningaasaliissutinut immikkoortitat pillugit Inatsisartut inatsisaata allanngortinneqarnera pillugu Inatsisartut inatsisaat nr. 13, 2. december 2009-

imeersumi oqaaseqaatit innersuussutigineqarput, "nalinginnaasumik oqaaseqaatit" ataanni § 1-imi nr. 10-mut oqaaseqaatit takukkit.

Nr. 2-imut

Angallat sillimaserneqarsimanngippat angallatip nalinga naliliisartumit arlaannaannulluunniit attuumassuteqanngitsumiit, Aalisarnermut, Piniarnermut Nunalerinermullu Naalakkersuisoqarfimmiit toqqarneqartumiit, nalilerneqarsinnaavoq. Arlaannaannulluunniit attaveqanngitsumik oqarneq ima paasineqassaaq, naliliisartup naliliinera arlaannaatigulluunniit apeqquserneqarsinnaassanani. Aammattaaq naliliisartup angallatip naleqarnerata naliliisinaaneranut tunngaviussaaq naliliisinaanissamut atasumik ilisimasaqassammat. Naliliinermi angallatip sillimaserneqassaguna naligisinnaasaa ujartorneqassaaq.

Qinnuteqartup angallatip nalilerneqarnerani aningaasartuutit akilissavai kiisalu qinnuteqartup naliliisitsineq nammineerluni isumagisassaralugu. Tamanna isumaqarpoq qinnuteqartup nammineerluni nalilersitsinermi suliaq isumagissagaa.

*§ 2 –imut*

Siunnersuutigineqarpoq inatsit atuutilissasoq ulloq 1. januar 2012.